

Robert Candelaria candidato nobo riba lista di AVP

ORANJESTAD – Segun e comunicado di gobierno ta bisa, Diahuebs mainta den un Cas di Partido di AVP (Playa), ex miembro di Cuerpo Policial Robert Candelaria a wordo presenta como candidato nobo riba lista di AVP. Por a scucha ex vocero policial Papito Comenencia y Ricardo Muller, papiando di e personalidad di Candelaria. E candidato su ex hefe mas halto, Minister Arthur Dowers, tambe a hiba palabra mustrand cu e adkision nobo aki ta algo hopi positivo pa e partido.

Mike Eman durante presentacion a papia di un candidato hoben y profesional, cu sigur lo contribui na un di e temanan cu e ultimo añanan a wordo hopi comenta, analisa na Aruba. Si tin algo cu ta



caracterisa AVP, ta cu cada retonan, di cualkier indole, e partido semper a busca personanan cu e sentimentonan patriotico pa carga luchanan constitucional di e pais aki, y haci sacrificionan grandi pa

realisa e retonan. Por ehempel den retonan economico, AVP a sa di forma ekipo cu por a hiba Aruba den añanan di su pio crisis (1986), mescos na 2009 ora cu den deterioro y decadencia den e pais y relacionnan den Reino den crisis, Aruba tabatin mester di un perspectiva nobo, a forma un ekipo nobo cu e pueblo a brasa pa un cambio importante, lider di partido a bisa segun e comunicado.

Awo den 2017 ta mira cu tin interes pa sigui construi riba estabilidad y progreso cu a crea y hiba Aruba ariba den un siguiente etapa di progreso, estabilidad y siguridat. "Cada reto tin su tempo y cada tempo tin su plan y tin su ekipo. AVP ta mira e panorama y plannan cu nos tin cu presenta pa por sigui hiba Aruba dilanti. Tambe ta mira e panorama di personalidadnan cu tin den e pais cu por yuda fortifica e ekipo aki pa nos por cumpli un biaha mas cu retonan importante. Nos ta realisa nos responsabilidad den cada etapa y historia di nos pais. Awe treciendo den nos ekipo sr. Candelaria, mi ta kere cu un bes mas AVP ta cumpli pa pone na momento corecto, e personalidadnan hunto, tanto di e ekipo existente como esun nobo cu ta reforsa y renoba pa 2017 y e añanan cu ta bini," Eman a trece dilanti. Lider di Partido AVP cu honor a presenta candidato nobo riba e lista berde sr. Candelaria, un ex miembro di alto rango di Cuerpo Policial di Aruba.

